

■ COLUMNA

La citrona n'è betg adina ascha

DA SILVANA DERUNGS

Appartegnais Vus er a quella spezia da glieud che n'ha nagin motto da vita? U almain betg in motto pachetà en ina sentenza compacta e chapai-vla? En il decurs da l'onn passà hai jau legì diversas intervistas ed adina puspè sun jau stada surstada da la dumonda suenter il motto da vita. Ed anc dapli da la respota. Jau n'avess numnadamain betg pronta ina risposta – franc nagina che avess plaz sin ina lingua. Questa mancanza m'occupa lura adina da nov. N'hai jau forse nagin'orientaziun per la vita, sch'in motto ma manca? Tutga in motto da vita che tuna in pau intelligent tar in uman in pau cultivà? Per orientaziun per in bun cristian dessi sa chapescha ils diesch cumandaments, ma in unic mussavia condensà fiss pli pratic ed adattà al temp dad oz. Forse pudess jau – al lieu da far in mantun propierts per mo in onn – prender a mauns insatge per ina proxima fasa da mia vita: La fasa cun motto.

Per m'orientar hai jau empruvà da ma regurdar dals mottos legids durant l'ultim temp. Jau n'hai betg gist fatg ina rangaziun, ma en buna memoria m'en p. ex. ils suandants plets: «Na siemia betg tia vita, mabain viva tes sie-



mi!» Na gliez, mes siemis nocturns èsi meglier da laschar ordaifer mia vita reala. Ma serius: Jau ma sprov sco autra glieud era da realisar da temp en temp in u l'auter giavisch ch'jau hai, ma tscherts giavischs (p. ex. naginas mars tschufagnadas e surpestgadas) na dependen halt betg mo da mai. Ma mes (unic e grond) siemi mo per mai è forse gist uschè impussibel da pachetar en ina lingua sco mes motto – e sche tuttina, al numnass jau probablain betg en quest lieu qua.

Forsa ch'in auter motto ma cunvegn meglier? P. ex. in dals sempverds en la glista da mottos: «Viva mintga di sco sch'i fiss tes ultim di!» Puha! Strusch realistic, sche jau quint da tuttina anc survivor il di dad oz e forse er anc quel da damaun. Evidentamain ch'i n'è betg manegià uschia, mabain en il senn da viver pli fitg en il mument, gist tenor in'autra

maxima frequenta «Carpe diem – nizzegia il di!» (che tuna anc bler pli intellectual, sch'ella è formulada per latin). Jau admir quel-las persunas che pon s'orientar tenor quest motto: Giudair il preschent e betg s'occupar da piculezzas sco la penibladad da l'emna passada u il plaschair da la festa che ha lieu pir en dus mais. I n'è betg uschia ch'jau vivess sper il preschent or (pens jau almain), ma da trair atras quest motto emnas a la lunga n'hai jau betg interiurisa. Quai è forse in pass memia grond per ina principianta da mottos.

Avant insaquants dis – Adurant mangiar in bun cake da citrona (là hai jau giudì il mument, mo per dir) cun bunamain anc pli bunas citronas decorativas da marzipan sissur – ha insatgi en la runda menziunà che la citrona na saja betg adina ascha. E jau hai pensà dad ina giada surpigliar questa sentenza per cumbatter las provocaziuns da la vita.

Forsa pensais Vus che quai saja ina tenuta bravamain pessimistica? Lura di jau: a) Viver mintga di cun il patratg ch'i saja l'ultim n'è era betg gist propi euforic. b) Jau mang mintgatant era citronas aschas. c) Tge motto avais Vus lura?